

[www.BibleForChildren.org](http://www.BibleForChildren.org)


# Zenesesi 3




Ego, poza nia lvi sa tie, sa nana  
barikaleqe, sina na tinadia ri  
doduru tie toadi si asa.



Ego, sa noki si keke kurukuru  
sekesekeina, holani sari doduru  
kurukuru pule, saripu ele taveti e  
Zihova Tamasa. Zama la ia sa noki sa  
barikaleqe, “Vegua, ele zama hinokara  
nia Tamasa sapu lopu kaqu henai  
gamu vuadi sari doduru huda koasa  
inuma hie, gua  
taga?”



Meke ola<sup>u</sup>nia sa  
barikaleqe sa noki,  
“Boka henai gami sari  
na vuadi rina huda  
koasa inuma. Ba zama sa Tamasa sapu  
lopu kaqu hena ia gami sa vuana sa huda  
sapu koa pa vari korapana puta sa inuma,  
meke namu lopu kaqu tiqua  
gami si asa, pude lopu gua  
si kaqu mate si gami  
kara! gua.”



Ba zama la sa noki  
koasa barikaleqe,  
“Lokari hokara lopu  
kaqu mate si gamu kara!

Ura gilania Tamasa sapu pana hena ia  
gamu si asa, si kaqu tava vaununu sari na  
matamia, meke kaqu gua tugo sa Tamasa  
si gamu, pude gilania sapu  
leana meke sapu kaleana.”



Meke sipu doño la ia sa barikaleqe sa  
vuana sa huda sapu doño lea pa  
matana, meke leana pude hena ia,  
meke ta okorae tugo pude gilae, si  
paketia sa si asa meke hena ia. Meke  
ponia sa sa loana,  
meke somana hena  
ia sa si asa.



Meke sipu hena ia tugo ri kara si asa  
si hinoqa tava vaununu sari na matadia  
meke gilania ri kara sapu dodoho si  
arini. Ke piti vari kapaeni ri kara  
sari na elo piqi d pude taveteni  
dia tivitivi, gua.





Ba tioko la ia e  
Zihova Tamasa sa tie, meke nanasia,  
“Pavei koa si goi?” gua. Meke olaña sa tie, “Avosia rau  
sa halabutu nenemu Goi pa korapa inuma, ke matagutu  
qua sina na dododohoqu si rau. Ke tome qua!”







Meke zama sa  
Tamasa, “Esei tozi nigo sapu  
dodoho si goi, gua? Vegua, ele hena ia goi sa vuana sa  
huda sapu heki nia Rau koa goi?”



Meke zama sa tie, “Sa barikaleqe sapu poni nau  
Goi, pude koa koa rau, asa si poni nau sa vuana  
sa huda, ke hena ia rau si asa,” gua si asa.  
Meke zama la se Zihova Tamasa koa sa  
barikaleqe, “Tio, na sa sapu ele tavetia  
goi?” Meke olaņa sa barikaleqe, “Na  
sekesekei nau sa noki si rau, ke  
hena ia rau sa vuana sa huda,”  
gua si asa.



Gua asa, si hitu pania Zihova Tamasa  
pa Inuma Idini si asa, pude mani  
uma ia sa sa pepeso vasina sapu  
ta tavete mae guana si asa.






Meke sipu ele hadu vura nia Sa sa tie  
si vekoi Sa pa kali gasa rimata koasa  
inuma Idini sari na mateana, meke  
sa vedara huruhuruṅuna, sapu  
avaṅa varikali pude kopu totoko  
nia sa siraṅa la  
gua koa sa  
huda tinoa.




Sipu koa turania Adama se Ivi, sapu sa nana barikaleqe, si aritiana si asa, meke podoa sa se Keni. Meke zama si asa, “Ele vagia rau si keke tuqu koreo koasa tinokae te Zihova,” gua. Meke mudina sa si podo pulea sa sa tasina, sapu se Ebolo. Meke sipu noma sage se Keni si ta evanae na tie uma si asa, meke se Ebolo sina tie kopu sipi.



Meke sipu hola kaiqa totošo si paleki e Keni si kaiqa vinariponi na vuadi sari na nana linetelete pa kenuna Zihova. Meke se Ebolo tugo si turaṅa lani sa sari kaiqa tuna sipi podo kenudi koasa nana rovana, va vukivukihi lani sa sari na kukurudi sapu leadi na deanadi.



Meke qetu nia e Zihova se Ebolo, meke sari nana  
vinariponi. Ba lopu qetu nia Sa se Keni meke sa  
vinariponi tanisa, ke bugoro hola se  
Keni, meke kaleana sa dinoŋo  
pa isumatana.



Meke zama la ia Keni se Ebolo sa tasina, “Aria, mada la pa inuma.” Meke sipu korapa koa ri kara pa inuma, si gasa taliri la ia Keni sa tasina meke seke va matea sa si asa.





Meke beto hoirana zama ia e Zihova se Keni, “Avei se Ebolo sa tasimu.” Olaña si asa, “Lokari, lopu gilania rau. Arau si lopu na tie kopu tanisa tasiqū,” gua si asa. Meke taluarae taloa se Keni pa kenuna e Zihova meke la koa pa popoa Nodo si asa, pa kali gasa rimata pa Idini.



Meke va tata pulea Adama sa nana barikaleqe, meke podoa sa barikaleqe si keke tuna koreo. Meke poza nia Seti sa sa pozana, meke zama, “Ele poni hobe nau Tamasa si keke koburu pule, sapu na hinobena e Ebolo, sapu ele seke va matea e Keni.”



Pa mudina sa pinodo te Seti, si toa kamoā vesu gogoto  
vuahehina pule se Adama, meke koadia pule kaiqa tuna  
koreo na vineki si asa. Ego sa vinarigaraedi  
ri doduru vuahehina pu toai Adama, si ka sia  
gogoto toloṅavulu, meke tiqe mate si asa.




Meke sipu dogoria e Zihova sapu nomana hola sa sinea tadi na tinoni pa popoa pepeso, meke kaleadi la mo sari na dia binalabala doduru totooso, si talotaña hola se Zihova sapu ele taveti tu Sa si arini, meke balabala mamata si Asa.



Ke zama se Zihova, “Kaqu sara pani betoni Rau pa popoa pepeso sari na tinoni hire saripu taveti Rau, meke gua tugo sari na kurukuru made nene, na kurukuru name na kurukuru tapuru pa galegaleane, sina talotaña hola nia Rau sapu ele taveti

tu Rau.”



Ba se Noa si ta qetue koe Zihova. Hie sa  
vivineina e Noa. Ka ŋeta sari na tuna koreo  
e Noa: ari Semi, e Hami, meke e Zapeti.



Keke tie toŋotona koari na tinoni si asa pa nana  
totoso, ke lopu ta zutu koari na sinea si asa,  
meke tavetavete na ene luli pa hiniva te  
Tamasa.



Ura tataru sisigiti nia Tamasa sa kasia  
popoa, ke poni nia Sa sa Tuna ekei,  
pude arini pu raña si Asa  
si lopu kaqu tava kilasa pa  
Heli ba kaqu tagoa rini  
sa tinoa hola.





Roma 3:23 ura ele tavete va sea sari doduru tie, ke lopu hite nana kamoā rini sa tinoŋoto te Tamasa.

Roma 6:23 Ura sa tinabara tanisa sineā si na minate tugo, ba sa vinariponi moka te Tamasa si na tinoā hola pa korapa Zisu Karisito sa nada Baŋara.

Hiburu 9:27 Gua tugo hopeke gita si kote mate keke totoŋo mo, beto asa si kote tiqe ta pitu koe Tamasa.

Episasi 2:8,9 Ura koasa tataru variharupi mo te Tamasa, si ta harupu si gamu pa korapa rinaŋerane, meke sa tinaharupu si lopu mia tinavete telemia, ba na vinariponi mo te Tamasa. Ke loke tie si boka vahesi pule nia, sina lopu mae gua pa mia tinavete soti si asa.



Roma 10:9,10 Be helahelae vura nia goi pa nuzumu sapu e Zisu sina Baṅara, meke va hinokaria goi pa bulomu, sapu va toa pulea Tamasa se Zisu pa minate, gua, si kaqu ta harupu si agoi. Ura totošo va hinokara ia gita se Zisu pa korapa buloda, si ta pozae na tie toṅoto si gita koe Tamasa. Meke sipu helahelae vura nia gita sa nada vina hinokara, si ta harupu si gita.

Zone 3:16,17 Ura tataru sisigiti nia Tamasa sa kasia popoa, ke poni nia Sa sa Tuna ekei, pude arini pu raṅea si Asa si lopu kaqu tava kilasa pa Heli ba kaqu tagoa rini sa tinoa hola. Ura lopu garunu mae nia Tamasa sa Tuna pude pitu ia sa kasia popoa, ba pude ta harupu sa kasia popoa koa Sa.



1 Zone 5:11-13 Meke hie tugo sa vina sosode, sapu ele poni nia Tamasa koa gita sa tinoa hola. Meke sa tinoa hola hie si koa pa korapana sa Tuna. Asa sapu tagoa sa Tuna, si tagoa sa sa tinoa hola. Ba asa sapu lopu tagoa sa Tuna, si lopu tagoa sa sa tinoa hola. Kubere atu nia rau si hie koa gamu pu va hinokaria sa Tuna Tamasa, pude boka gilana valeania gamu sapu ele tagoa gamu sa tinoa hola.



# Zenesesi 3 – 6

Storyline by: Edward D. Hughes

Illustrated by: Byron Unger, Lazarus  
and Alastair Paterson

Adapted by: M. Maillot; Tammy S.

Roviana Bible (rug) © 2016, Wycliffe Bible Translators, Inc.  
All rights reserved.

<https://live.bible.is/bible/RUGWBT/GEN/1>

©2025 Bible for Children, Inc.

[www.M1914.org](http://www.M1914.org)      [www.bibleforchildren.org](http://www.bibleforchildren.org)

